

天一閣藏明代方志選刊

太平縣志

ZD56/1702

一九六三年七月上海古籍
書店據寧波天一閣藏明嘉
靖刻本景印原書版框高一
九〇公分寬一三·二公分

太平縣志序

太平爲台南土介黃巖樂清間成化
中始析爲縣縣之故無有司存存乎
二縣之籍而已至是專治頗久事勢
不能盡同則宜有志而以犬牙其間
及今不爲後益不可問矣吾友海峰
葉君獨居山中構思以俟於是雙溪
曾侯來令與語大悅遂挈而授之志

成度受而卒業焉嗟乎壯哉縣乎其
自此聞乎可以觀乎今天下好文之
州不急於江南矣家有乘郡縣有紀
何其縉也以予旅游之所覩記或連
數城無前日事時時聞故老言與存
幾何不有作者亦孰知斯二人之為
功雖然昔之為縣二今之為志三志
其源則太贅志其委則太畧不志則

散夫竄籍無稽飛稅易詭凡新所置
縣同豈惟難於吏亦難於志大者志
為文獻設也賢者受爭不肖者委棄
中士而忘故非特作之之難而述之
之難也是故經備述作史准經紀事
志變史立例歸於傳信而已矣妄史
辱國妄志辱鄉妄言辱身況於以其
一家之言而錯綜乎三縣之故猶之

以其三年之功而紉六十載之闕是
二者其殆不免乎今觀其書志地輿
而封守明則人思慎志食貨而國計
衷則人思節志職官而修廢具則人
思理志人物而監戒昭則人思勸凜
凜乎良史氏之風哉即後有作舍是
何鏡焉夫經濟之猷藏於郡縣市朝
之節先於鄉黨鄉黨之所不為郡縣

之所有為於是役也可以觀二君矣
雙溪名才漢字明卿前令袁之里人
海峰名良佩字敬之繼謝有志而俱
同時君子謂不媿其鄉云

嘉靖庚子季夏之吉

賜進士出身中順大夫知建昌府事前
兵部郎中石梁山人王度書

太平縣志序終

題太平縣志

夫志也者匪徒備物待稽之謂也有
觀道焉昔者周公繫觀之九五曰觀
我生非所以語治矣乎其上九曰觀
其生非所以語德矣乎是故職官也
者以治觀者也人物也者以德觀者
也是故觀之大莫大於兩爻志之大
莫大於二志閱是編者於德純文華

取治焉於二林泉溪暢軒諸儒取德
焉思過半矣合而一之拓而充之道
不在茲乎吾猶有異焉昔鄉先逸陳
簣窓之作郡乘也守屢更歲十餘易
刻乃成若謝文肅之嗣簣窓之緒也
亦然今是役也時而始代時而竣胡
亟邪海峰葉敬之氏邑之良也沈酣
乎五鄉之故雙溪曾明卿氏令之良

也攸孚于海峰茲其所由以無滯與
吾是以知天下事成於兩相與莫病
於孤立嗚呼觀于斯亦可以永歎矣
皇明嘉靖十九年冬十月己卯臨海一
所高賁亭題

大正二年

五

太平縣志目錄

卷之一

地輿志上

卷之二

地輿志下

卷之三

食貨志

卷之四

職官志上

卷之五

職官志下

卷之六

人物志上

卷之七

人物志下

卷之八

外志

襍志

右志六凡八卷而吾縣之故亦畧可舉已先是曾
侯明卿來議志事良佩曰縣僻左最晚著歷三國
六朝載籍希濶志難乎其始又新所置縣析黃巖
截樂清境土犬牙莫之昉分志難乎其中今子孫
之貴顯者孰不欲美其祖先徇或致譏否斯速謗
志難乎其終侯曰吾嘗商略之矣自宋嘉定以上
取諸陳壽老郡志即不備則採之諸家文集以及
斷碑殘碣嗣是以後則赤城新志可據也又黃巖
故有黃巖志樂清有樂清志前博士黃君縉常輯

之為太平草志顧其文義蕪莠而事或可採又不
備則問之父老博之傳聞乃若矢公任怨吾以身
與子同之又何難矣乃除館縣西墅之精舍聚諸
書于館選學官弟子博達者四人鄭珂金慶章沈
升吳中孚相予凡四閱月而志成叙曰在昔漢成
帝時劉向嘗略言其郡國地分而張禹使朱贛條
其風俗為地理志顧但繫之史無專書及東漢南
陽撰風俗志自後郡縣始各自為志至于今滋盛
焉且志者史之一體也而其法則具史而微是故

茲志之有地輿也猶史之郡國也之有食貨也猶
史之食貨也之有職官也猶史之百官也之有人
物也猶史之列傳也而刑政上下禮樂律歷兵權
具茲四志矣顧其為書史大而志小史貫穿數百
年章皇九州志不越平一邑耳矣而猥曰具史而
微不已誇乎然有一焉昔吳越王好畫集畫史問
難易有一史進曰夫畫摹其似也然而畫龍鳳易
畫損鶴難是何也損鶴人日見之一不似則以為
不似矣故難若龍鳳即不甚似亦難為辨故易夫